

FOMCA
gesa mansuh
kuota, batal
lesen
pemborong
sedia ada

Oleh Amir Abd Hamid, Yusmizal
Dolah Aling dan Rizanizam
Abdul Hamid
am@hmetro.com.my

Kuala Lumpur

Mansuh kuota, batalkan lesen pemborong sedia ada dan wujudkan mekanisme baru.

Itu gesa Gabungan Persatuan Pengguna Malaysia (FOMCA) kepada kerajaan dalam usaha memastikan bekalan ST15 sentiasa berada di dalam pasaran walaupun dalam kuantiti yang kecil bagi memenuhi keperluan golongan sasar komoditi itu.

Timbalan Presiden FOMCA Mohd Yusof Abdul Rahman berkata, biarpun secara keseluruhannya beras kategori itu kurang menjadi pilihan pengguna, program subsidi yang diperkenalkan sejak

SUSULAN ST15 TERUS LENYAP

Mansuh kaedah mudah tiris

2008 tetap diteruskan kerana ia masih ‘dicari’ mereka yang berpendapatan rendah.

Katanya, hanya dengan pemansuhan kuota dan pembekuan lesen dapat memastikan carta aliran beras daripada pengilang kepada pengguna bersih daripada sebarang unsur penyelewengan yang mengakibatkan ia tidak sampai kepada pengguna sasar.

Menurutnya, jika kerajaan menghadapi kesukaran untuk menentukan peruncit menjual beras ST15 atas faktor permintaan, ia perlu dikhususkan kepada peruncit tertentu sebagai alternatif mengatasi masalah kekurangan bekalan di pasaran.

“Umum mengetahui kerajaan memberikan sejumlah subsidi yang besar merentasi kuota ST15 dan timbul masalah lain seperti ketirusan yang kritikal, namun ia tetap perlu diteruskan ke-



LAPORAN Harian Metro,
semalam.

rana manfaatnya bukan sedikit.

“Bagi yang berkemampuan, mereka tetap membeli beras mahal, tapi perlu diingat, ada juga isu beras campuran dan sebagainya berpunca daripada pemain industri yang ingin mengaut untung atas angin,” katanya kepada Harian Metro.

Mohd Yusof berkata, tindakan tegas dan keras perlu dikenakan terhadap mereka yang didapat terbabit dalam penyalahgunaan subsidi ini termasuk membatalkan lesen dan disenarai hitam da-



MOHD YUSOF

ripada menerima kuota daripada Kawal Selia Padi Beras sebagai langkah drastik membendung aktiviti itu daripada terus berleluasa.

Katanya, permintaan sentiasa ada, namun ‘mainan’ pemborong yang mencampurkan beras ST15 dengan kategori lain seperti ST10 menyebabkan bekalannya seolah-olah ‘hilang’ dari pasaran terutama untuk me-

reka di beberapa kawasan luar bandar.

“Sebab itu kita mahukan satu pengumuman daripada kerajaan dalam Belanjawan 2016 supaya rakyat dapat merasai perubahan dasar pengagihan subsidi yang bukan saja menguntungkan pemborong, malah lebih penting meletakkan pengguna mendapatkan hak mereka sewajarnya,” katanya.

Isu ketirisan beras ST15 di-dedahkan Harian Metro sejak 23 Oktober 2014 sehingga kementerian mengumumkan di Dewan Rakyat, lesen 600 pemborong beras dibatalkan dan mereka dikehendaki menjalani proses temu duga semula sebelum layak diberikan kuota semula.

Laporan bersiri secara eksklusif mendedahkan ujian Makmal Penyelidikan Karbohidrat Fakulti Sains dan Teknologi Makanan Universiti Putra Malaysia

Serdang terhadap empat sampel beras 10 kilogram, mendapati semuanya mempunyai peratusan hancur berkali ganda jauh lebih tinggi berbanding yang dicat pada label.

Ia mencapai kemuncaknya apabila Menteri MOA ketika itu, Datuk Seri Ismail Sabri Yaakob dalam persidangan Dewan Rakyat 20 November 2014 mengumumkan lesen 600 pemborong beras dibatalkan dan dikehendaki menjalani proses temu duga semula sebelum layak memperolehnya semula.

Bagaimanapun, ia dikatakan masih berterusan malah lebih parah apabila Pengurus Eksekutif Kumpulan DCT Sdn Bhd Datuk Noridan Spee Yee mendedahkan daripada 600 lesen dibatalkan itu, tiada penambahbaikan dilakukan dengan penambahan lesen kepada 895.